



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Thai nunger sepaitemi civilian aliba
tesem atsünger lir: Sokhonn

ICC ODI rankings nung Kohli
No.1 asayar kümogo

VOL. XXIII ISSUE NO. 92 (ADOK 92) DIMAPUR YANGTEPNÜ (THURSDAY) AENJETI (JANUARY) 15, 2026

₹ 5.00

AKM ya Ao kin atema dang masü saka Naga nunger songjem atema tenzük: CM Dr.Neiphiu Rio

Chungtia, 14th Jan (TYO):

AKM ya 1929 küm Longkhum yimdak "Linük Asoshi" omen dak rangloker tenzükba ya Ao kin kisüing atema masü saka ibai Naga nunger songjen ajangzüksü asoshi liasü. Tetenzük nungi tensa tia balala ajuruaka itemji tizükteta aru aser iba ajanga Aor aser Naga kin tejakleni aoba nung tongti shilem agia arur. Anungji, nükla tulu yur tenzükertem aser taoba lenirtem nem tenüngsang agütsür ta metetdaksü.

Iba o ya Nagaland Chief Minister, Dr. Neiphiu Rio-i 14th Jan nü Ao Kaketshir Mungdang pur 70 buba inti mungdang yangi Chungtia yimdak tongti tesemdanger o jembidang lemsatep.

Tanü asen tsüraburtemi züluba otsü aser asen lenmang indang shisadanger, iba ya tesüiba mapang senmang ka dang masü saka tang aliba aser tarutsü mapa inyaksü asoshi yimyim ka lir. Iba ajanga asen tsürabur mangdang aser parnoki tarutsü putu nem agütsüba khuret bilemteper.

"Land of Pioneers" ta asüba den külemi parnoki bendanga agüja inyakba aser shisaliok ajanga Ao kin dang masü saka



Mungdang Choir-i ken atendang (Abelen) & Dr. Neiphiu Rio-i (Achiji) o jempiba noksa nung angur.

Naga nunger rangben len aniogo aser takar kümdaksüogo, ta pai ashi.

Alima ajunga nung print media ano kangabo bulua malidang len sayua AKM-i 1932 küm "Ao Naga Messenger" (tang Ao Milen ta melenogo) adoka shisatsü, osangori aser nüburtem rongnung telungjem bener arutsü. Küm aika Ao Milen-i asenok nem osangtsüasang agütsüba, taginüba ulushia aser lungjemtsü asoshi yimyim yokba sabang ka liasü. Asen lenirtemi rajemer liasü: ola madoki aliba nüburtemi pei tia yanglutettsü makok. AKM-i ochimashi anema kodanga ajemajema mali, yamaji yimtenren temeten aser Aor aser Naga nunger sakuku jenjang asoshi maneni noktak, ta paisa tenüngsang agütsü.

Taküm omen "Alizüngtem

Züngkümshiba" ajanga AKM-i Aor lokti nung tongshitem aser Naga nunger asoshi tamaitüsü ka ama maneni inyakba sayur. Züngkümshiba ya tasü aitba nukjidong, teinyaksü aser Naga nunger ajak telungjem indang tamaitüsü lir. Tanü asenok ajaki shilem balala, putu balala aser tangatetba balala nung lungjemtsüla aser iba jagi o lemteperba, kadi ka akümtsübutepsüba aser sabang ka nung arok shisatsü aser mangdang nung tera yanga yanglushitsütsüla, ta pai ayongzük.

Paisa shisadangtsü asoshi olen ka ashidang, kijaren, kidongren aser kinren (ism) shisatsü adenba yagi asenok taginüba (Naga nunger telungjem) memoksepdaksütsüla. "Nagaland terenlok" asoshi

telungjem, yimjung, ochishia aliba aser kadi ka akümtsübutepsüba asen len aniba ajok südaksütsüla, ta paisa shisem.

Ao kin temulung Mokokchung-i Nagaland nung azüngzülu metetba 91.62% (2011 census) ajangzuka lir. Naga nunger ajak asoshi shisarijudak tiyong aküm, nüngtugu lenirtem adokdaksü aser Mokokchung ya "Land of Pioneers" ta tenüng agütsü, ta pai ashi. Paisa iba dak sentakba nung olen kar metenloka ashidang, tanü asen state ajunga nung Kerala aser Mizoram sülen India nung kaket shisatsü kanga junga azünger state tasembuba kümogo, kong azüngzülu meteter shilem 20% ji graduate-tem dang lir. Ajisüaka, parnok rongnung 92% bo technical mesüra vocational skills mali, ibaji tebilemstü ka lir. Skill tsütsü

mongin akümtsübaji tenüngdaksü kümogo. Anungji, asen lanurtem nem tebilemstü koktetba shisatsü agütsü nung dang parnoki terenlok ka-a aser tasen yangerteta aoba nung maongka agitettsü, ta paisa shisem.

Naga nunger tebilemstü ya temzüng arla ka ajanga - mezüng British yimsüsüba kübok Bengal Eastern Frontier Regulation of 1873 aser tesülen India temzüng kübok Article 371(A) ajanga otsü tamaitüsü ka angu. Iba jagi Naga nunger maitsü (identity), yimsüyimbong aser sobalibaji balaka ta agizük, ta paisa Naga nunger kümzüka aliba indang otsüren kar lemsatep.

Sobaliba aser sobaliba wazüka ayur ka ama AKM-i asen rongsen takar kümzüka ayutsüla. Kaket shisashiba dak alia tsürabur sobaliba, benschia aruba yimsüyimbong, yimya aser jenjangtem kümzüka ayutsüla. AKM-i lanur nem angazükdaksütsü atema sabang yanglutsüla, aji oda, tawatanü terenlok ajanga asenok indang maitsü balakaji mesamadaksütsüla, ta paisa ajungshi.

(Maneni tapak 2 nung...)

Asen tetsü oshi ya asen ayak lir: Advisor Temjenmenba

Mokokchung Aenjeti/ January 14 (TYO):

Tarutsü lanur putuji koma ka asütsü asenoki meshitettsü, anungji tanü asenok iba ama tensa ka nung alidang asenok temeden jangja alitsü asoshi asenoki asen sobaliba jangja jangjaa meteta alitsüla ta Advisor & MLA Transport & Technical Education, Govt. of Nagaland Wb. Temjenmenba-i tanü AKM 70 Inti Mungdang nung Ao Oshi Ojang Lutet Tetoktepba Sentong nung tayongzükba o jembidang ashi.

"Tsüraburi asenok nem sobaliba tajung wazüka yutsü, asen tetsü oshi ya asen ayak lir. Asen ayak jangja jangaa meteter aliba mapang ano technology den aritepa aoba mapang nung asen sobaliba aser technology anaji liromedem asür masür aji asen Ao kini shisadangtsükanga nüngdaker" ta Temjenmenba-isa lemsatep.

Advisor Temejenmenbai-isa mungdang omen "Alizüngtem Züngkümshiba" ta asüba ya kanga dang tapet ka shimetogo, tanü putu ya shisadangra mejanger saakdangbo balaka melenshir alir, süra tarutsü anogotemji koma ka lia aotsü, Ao

kin lanurtem saksalema alitsü nüngdaker ta adenshia alir kaketshirtem ayongzuka jemb.

Ao Riju ketdangsüba kübok tsükong trok Ao Oshi Ojang Lutet Tetoktepba Sentong agi aser iba tetoktepba nung mezüngbuba jenjang Langpangkong Kaketshir Mungdang adok, tanabuba jenjang Asetkong Kaketshir Telongjem Mungdang adok aser Tasembuba jenjang Ongpangkong Kaketshir Mungdang adoka liasü.

Kasa sentong nungsa AKM Educational Promotional Trust Award senpet 2023 nungi 2025 tashi agütsütsüba liasü. 2023 küm Year of Commerce, 2024 küm Year of Arts aser 2025 küm Year of Science ta agütsütsüba liasü saka 2023 aser 2025 küm shingai temaba jenjang majangzüktet nung 2024 küm Year of Arts senpet Kr. Tatongmongla Kross College Kohima nungi Economics nung CGPA-6.98 ngutetba asoshi agizük aser Kr. Yashilemla St. John College Kohima nungi Political Science nung CGPA-6.98 ngutetba asoshi agizüka liasü.

(Maneni tapak 2 nung...)

Menden lemsatsü asü mesürapei mulungka nung tokteptsü'ar mejangja

Chungtia, 14th Jan (TYO): Taoba mapang nungi Naga People's Front (NPF) o BJP na külemi lokteper (alliance) yaritepa aruogo aser taoba 2023 Nagaland state election nunga NDPP (tangbo NPF kümogo) o BJP na alliance süa tangatettep nung menden lemsar election toktepogo, aser 28 Koridang Assembly Constituency ya-a seat sharing küboki aita asür Imkong L. Imchen BJP ticket nungi ir tia junga adoka liasü, ta NPF Secretary General & MLA, Achumbemo Kikon-i metetdaksü.

Pai iba o ya pa Chungtia yimdak AKM sentong nung adeni arudang osangbenertemi pa dang Koridang A/C bye-election kodang agidir taoba

mapang amato "40-20 seat sharing formula" nung maneni aotsü asü mesüra NPF nungia candidate karbo yoktsü bilemdar? ta asüngdangdang pai langzüa ashi.

Tangji regional party ana-NDPP o NPF na ka kuma lokteper NPF dang kümogo. Ajisüaka iba "seat sharing formula" ji maneni lir amai angateter, anungji, alliance party pur den iba dak sentakba nung tali tejangjaba nung jembiteptsü, kechiaser tang tashibo iba anepaluba (seat-sharing) nung akangkanga noktaka lir amai bilemer, ta pai ashi.

Aji oda, tajungtiba ataloktsü imla-a atar, saka election tang agütsü masü, ano mapang talangka lir. Assam election agiba

den külemi April nung agütsü amai bilemer, ta paisa shisem.

"Tajungba imla-a atadi saka nüburtem dang ya dang shinüra, yimlibilema onük support südaksünür", ta paisa mepishia metetdaksü.

Nagaland Chief Minister, Dr. Neiphiu Rio Chungtia yimdaki Ao Kaketshir Mungdang 70 buba inti mungdang adeni arudang, iba osangbeneri, "2023 election nung ama, BJP den seat sharing formula nung aotsü asü mesüra pei-pe mulungka nung tokteptsü?" ta metetnua asüngdangdang, "tasüngdangba tai (wrong question)" ta langzü. Saka ano osangbeneri maneni nenshia asüngdangdang, pai "melangzütsü (no comment)" ta langzü.

Dimapur nung Civil Defence Volunteers arangshir

Dimapur, January 14, 2026 (TYO): Dimapur district nung Civil Defence Volunteers, Wardens aser Chief Wardens atema 2nd phase training tenzükogo.

Iba sentong ya January 14 nungi January 20, 2026 tashi Multi-Purpose Sports Complex, DC Court, Dimapur nung agir.

January 14, 2026 nü training tenzükba sentong nung Viboto H. Sumi, SI menden liasü aser District Commandant, Home Guards, Civil Defence and State

Disaster Response Force (HG, CD & SDRF), Dimapur M. Yingnyei Konyak-i okila jemb.

"Lokti nung rongdak nüngdak adokdang civil defence volunteers-i tongtoret ama shilem agir. Training agiba wardens aser volunteers ajanga lendong balala atalokdang tongtipang shilem agiba dang masü saka tensa junga alidanga public kümzüka ayutsü mapatem inyaker" ta EAC, Dimapur Litsenthung Kikon-i ashi.

Paisa volunteers dang district

administration aser tanga line departments den amalitepa disaster management maparen akangshitsü ayongzuka liasü.

Iba training nung Dimapur Municipal Council wards 1, 5, 7, 9, 11, 12, 13, 14, 15, 17, 18, 19 aser 23 den Signal Angami Village nungi Civil Defence wardens aser volunteers 90 aden.

Iba sentong ya Home Guards, Civil Defence and State Disaster Response Force, Nagaland ajanga ayongzuka agir.

Advisor Wangpang Konyak-i Mon nung ICDS & CDPO office semzüko



Advisor, Social Welfare, Wangpang Konyak-i Mon nung ICDS & CDPO office semzüksüba mapang tangokba noksa ka yangi angur.

Dimapur, Aenjeti/January 14 (TYO): MLA& Advisor, Social Welfare Wangpang Konyak-i January 14, 2026 nü Social Welfare Office Complex, Mon nung District Programme Officer (ICDS) and Child Development Project Officer indang office building semzükjia liasü.

Advisor Wangpang Konyak-i iba sentong nung jembidang, danga district nung ama masü Mon district nungbo pei office aliba ya kanga tia taka, ta ashi.

Pai ketdangsür aser staff tem dang pei mapa temulung agüja inyaksü ajungmeso aser staff tem dang sorkari agütsüba osettsüset tajungtiba nung amshitsü ayongzüik.

Mapang shidak nung iba ki renemba (ita 18) atema pai Er. Talisunep Jamir aser par team nema tenüngsang agüja liasü.

Secretary, Social Welfare,

Limawabang Jamir, IAS ajanga mapang tatsüka jembidang state nung best performing district tem rongnung ka asüba atema Mon District, Social Welfare Office Staff nem tenüngsang agütsü aser Anganwadi workers aser Helpers temi meranga inyakba atema tenüngsang agüja liasü.

Paisa nüburtem dang sorkar scheme balala nungi tajangzüik angutsü atema Aadhaar enrolment asütsü ajungshia liasü.

Deputy Commissioner Mon, Wennyei Konyak, NCS ajanga ibai district asoshi tejak tentetba mapang ka lir ta ashi aser Chief Minister-i anir sorkar dang pelaba lemsatepa liasü.

Pai ketdangsür aser staff tem dang mapa tajung maneni inyaksü ajungmeso aser nübur ajangzüksü atema District

Administration-i yaritsü ta ashi.

Sentong nung Executive Engineer, Social Welfare, Er. Talisunep Jamir ajanga iba building yangluba indang osang agütsüba mapang Social Welfare complex aser District Programme Officer & CDPO office building (Retaining Wall, Security wall & CC compound pavement densema) ya sen 2,98,96000/- agi renem, ta ashi.

Sentong nung Director Social Welfare, Tosheli Zhimomi menden liasü aser Rev. Yeangphong Konyak, District Chaplain ajanga meshiteta sarasademtsü.

DWO Mon, Atong Yanlem-i pela agizükba o jembi, Anganwadi Workers, Mon Project ajanga temeja ken aten aser H. laitak Konyak, CDPO Mon ajanga melepzüng o jembia liasü.

Chümoukedima nung CM-MOT Free Surgical Camp ayongzüik

Dimapur, Aenjeti/January 14 (TYO): Chief Minister Mobile Operation Theatre (CM-MOT) Free Surgical Camp ka Community Health Centre Dhansiripar, Chümoukedima nung January 14, 2026 nü ayongzüka yangji aliba nüburtem nem angati surgical healthcare services agüja liasü.

MLA and Team Leader of CM-MOT, Dr. Tseilhoutuo Rhutso-i iba sentong nung jembidang, January 26, 2025 nung iba sentong tenzüker iba kübok awajemba tesemtem rongnung Dhansiripar ya 23 buba lir aser tang tashinung surgeries 1,000 dak tema agiogo, ta metetdaksü.

Iba ama nüburtem dang ranglokba sentong ya Chief Minister dak mangdang aliba ajanga lir ta ashi aser iba camp indang nükjidong ya nüburtem, talisa yimdak-yimtsüng nung alirtem nem healthcare service tajung pei kishizüng tonga bener arua agütsütsü nükjidong nung lir, ta ashi.

Paisa Dr. Kenie, Anaesthesiologist; Dr. Lanu, Dental Surgeon aser Dr. Moa, Laparoscopic Surgeon aser nurses aser staff tem densema CM-MOT medical team ajanga shilem tajung agiba indanga lemsatepa liasü.

Iba sentong nung Advisor, Industries and Commerce, Hekani Jakhalu-ia Dhansiripar

nung aliba nübur ajunga dang CM-MOT kübok agütsüba service agitsü ajungshia liasü.

Lai Dr. Tseilhoutuo Rhutso aser par medical team dang pelaba lemsatepa liasü.

Iba sentong nung SDO (Civil), Dhansiripar, Vejoyo Swuro, NCS menden liasü, Chenirao Jungi, Pastor, UBC Dhansiripar ajanga sentong tenzüka sarasadem, Ringthar Jigdung, Chairman, CHC Dhansiripar ajanga pela agizükba o jembi aser Joybolal Khemprai, Village Council Chairman, Dhansiripar ajanga melepzüng o jembia liasü.

Dhansiripar nung iba health camp ya January 15, 2026 nü tembangtsü.

Asen tetsü oshi ya asen ayak lir... (TAPAK 1 NUNGI...)

Iba sentong nung Tsüngremer lenisüba jazüka Sapangya Baptist Arogo Pastor Rev. L. Meren Kichu ajanga sarasadem, Soyim Shisaluyimer Telongjem ajanga sobaliba ken tena telok ayongzüik aser Ao Riju Publication Head Wb. I. Temjen Tzüdir ajanga Tsüngrem nem tenüngsang agüja sarasadema sentong tembangba den AKM Shisaliok Zülur Sb. Lanulemba Longchar ketdangsüba nung sentong agia liasü.

Kasa anogosa tasembuba sentong Taoba AKM Tir Wb.

Nungdokyangker ketdangsüba nung agi aser Bodhbar aonung sentep Chungtia Baptist Arogo Pastor Rev. M. Laka Tzüdir ajanga tekülem mapang tatsüka agia liasü.

Resident Commissioner Govt. of Karnataka New Delhi Wt. M. Imkongla Jamir, IAS ajanga tayongzüka o jembi aser Watsü Mungdang Tir Wt. Tianaro-ia tajungshi o jembia liasü.

Kasa sentong nungsa Kr. Aremsola ajanga ken tajung ka aten aser Onük "Tarutsü

Lanuasensor: Melenshiba lima ka nung shisaluin, Yimden yimsüsüba, Tongtepratepren, Tamangbaren aser Shishilembaba tsütsü lensayua aniba." nung ajemdaker Kr. Imkongnukla Ao EAC, Longleng, Er.Lanuwabang Director NIELIT, Kohima Govt. of India, Wb. K. Temjen Jamir Yim O Zülur, Tir Yimyim aser Rev. Dr. Wati Aier Convenor, FNR parnoki shisa lemsaa liasü aser iba shisalem ya Taoba Repsem Zülur AKM Wb. Shilukaba Longchar-i ania liasü.

Angh-i Sokronye benjong salem lemsatep

Dimapur, Aenjeti/January 14


(TYO): Chakhesang nunger adianu aser adianutsürtem dang Sokronye benjong salem abener, ta Nagaland Angh Ajay Kumar Bhalla-i sangdong ka nung ashi.

Iba meshitetba aser asendenshiba benjong ya tanüla mürekba, lungjemshiba aser alu wadang tasen asoshi

renemshiba mapang ka lir.

Sobaliba nung aliba ama külemkeja nüburtem tesendaktep akangshia iba benjong yagi tesendaktep aser arok terenlok ajungmesotsü imlar. Iba benjong ajanga tesunep, yimchiyimjung aser temoatsü lidakjang ta moatsür, ta sangdong ajangasa ashi.

T Monalisa Changkija-i züluba 'This Silence' kakat saya



Dimapur, Aenjeti/January 14

(TYO): Osangbener tejen aser sangro mejemer T Monalisa Changkija-i tang tesüsa züluba 'This Silence' kakat Bodhbarnü Vice Chancellor, North East Christian University Dr. Darlando Thanmi Khathing-i sayatsüogo.

Assistant Professor Benny Sumer Yanthan-i iba kakat indang lemsatepba mapang, 'This Silence' ya takum jangratema aliba sangro tem lir ta ashi.

Yimya aika nung iba sangro tem bendenba kakat nungya

teburtemi amokbanger aliba lokti aser tensa nung kakat züluri tetsübo mali osang abenba indang kuli sayur, koba ajanga Naga lokti melenshitsü.

Lai yim o züluba, post-eds, op-eds aser anchors ama iba kakat nung tebilemdangtsü jenti lir. Tazünger asoshi iba kakat nung shisatsü jenti lir, aser loktiliba aser kija tesendaktep dak sendakba nung tazüng aliba süngdaksütsü shisatsü lir.

Lai züluba sangro tem kakat kuma bendenba nung yariteper ajunga dang Monalisa-i pelaba lemsatepa liasü.

AKM ya Ao kin atema... (TAPAK1 NUNGI...)

Ibai temelenshi adokba mungdang ka aser nükjidong yur temulungtetba agi tejakleni aotsü asoshi ajak ajungmesotsü, tashi itta alitsü, yimyasübarsü aser terenlok nung bendanga agütsütsü alizüng yangluba ka süjangma. 70 buba inti mungdang ya bilemtetba aser tangatetba tajung ka ama lirumedema aser maneni renloka aotsü imlar, ta paisa moatsü.

Nagaland CM Rio-i Chungtia nung AKM 70 buba inti mungdang amungba nüngtem yangluba nüngshilung ka sayatsü aser paisa Chungtia ya waliwalir yim ka ama züngoktsü sangdonga liasü. Chungtia yim ya Nagaland nung yim tejentiba rongnung ka aser par lushi nung jangratemtsü otsüsütsü aketba tesem kar

angutsü.

Sentong nung Nagaland RD & SIRD Minister, Metsübo Jamir, Sb. Lanutoshi Aier, President AKM; Sb. Mtseisuding Heraang, President NSF; Zuchombemo Jungio, President, CNSA; parnoki tajungshi o den tir ola, salem otem lemsatepa liasü. Iba sentong nung Delhi Ao Kakatshir Telongjem tir, Sb. Yimjungsunep Sanglir menden liasü. Mungdang

Choir aser Note Grid, Mokokchung ajanga sobaliba kensü nung ken tajung atenba ajanga tesentepertem ajungmeso. Tanep Alempang Baptist Arogo Pastor Rev. Ngangnen Longkumer den temoatsü meshia sarasademer sentong tenzüker aser Aliba Baptist Arogo, Pastor, Rev. Nungshi Pongen den tenüngsang agüja sentong tembang.



January 14, 2026 nü New Delhi nung Ato kilonser, Narendra Modi-i Pongal benjung sentong ka nung jembiba noksa nung angur. Pongal benjung ya Tamil nungertemi alima tesem ajaklen amonger.

India-i sensotem dang tekaraba nung Iran toktsütsü tuyur

New Delhi, Aenjeti/January 14 (Agencies): Bodhbarnü India-i Iran nung aliba sensotem dang tekaraba nung iba linükji toktsür arutsüla, ta metetdaksüogo.

Tang Iran nung nüburtemi longkak tesashiba aitba mapang Mongolbarnü US Tir, Donald Trump-i, pai Iran nunger lenirtem den senden ajak thinenogo aser longkak aitertem yaritsü atema Iran-i aotsü, ta metetdakja liasü.

Tamalen-a India-i sensotem dang iba linük jagi maotsü mesüra yangji aliba sensotem dang kanga kümdanga alitsü metetdakja liasü.

Ministry of External Affairs (MEA)-i, tang Iran nung aliba sensotem (kaketshirtem, temeshi ainlen jajartem, business inyakertem aser raliwalirtem) dang commercial tayimtsü densema transport balala ajanga iba linük toktsütsü

mepishir, ta metetdaksü.

MEA-isa India nunger sensotem aser PIOs dang kanga kümdanga alitsü, longkak aitba tesemi maotsü aser Iran nung aliba Indian Embassy den tongtepratepa alitsü metetdaksü.

"Iran nung aliba India nunger ajak dang pei ket nung passports aser IDs densema travel & immigration documents ajak renema alitsü metetdaksür. Iba dak sendakba nung teyari atema Indian Embassy den tongteprateptsü mepishir," ta kasa sangdong ajanga metetdaksü.

MEA-isa Indian Embassy indang emergency contact helplines- Mobile Numbers: + 9 8 9 1 2 8 1 0 9 1 1 5 ; + 9 8 9 1 2 8 1 0 9 1 0 9 ; + 9 8 9 1 2 8 1 0 9 1 0 2 ; +989932179359 aser Email: cons.tehran@mea.gov.in lemsatep.

India-i dang masü saka US-

i Iran nung aliba sensotem nem tekümdangtsü metetdaksü. Iran nung aliba United States Virtual Embassy-i, Iran tesem balala nung longkak aitba ya tesashiba akümtsüa akok, ta metetdaksü.

Mongolbarnü US Tir Trump-i Truth Social ajanga, "Pei linük meimba Iran nungertem, MANENI LONGKAK A I T A N G - N E N O K REJUTEM AGIANG!!! ... TEYARI LENMANG NUNG LIR," ta metetdakja liasü.

Trump nem telangzüba agüja Iran UN ambassador Amir Saeid Iravani-i UN Secretary-General aser Security Council dang United States-i rara ajungshiba aser par linük amokmerenba atema US aijang, ta takhangba agütsü.

Pai shidi ajanga, UN aser Security Council dang, US Tir Donald Trump-i yimjak nung Iran nung raratsü ajungmesor, ta metetdaksü.

Kolkata nung Nipah Virus agi shiranger nurse ana kanga mejungi lir

New Delhi, January 14 (Agencies): Kolkata nung Nipah virus putetba nurse ana 'coma' nung lir; tenaprongla Beliaghata ID Hospital nung mongdar, ta Bodhbarnü state health department nungi tongti ketdangser kati metetdaksü.

Hombarnü nurse ana dakji Nipah virus putetba sülen Mongolbar aonung nurse ka Beliaghata hospital-i anir ao aser Bodhbarnep nurse ka Burdwan Medical College & Hospital nungi Beliaghata

hospital-i anir ao.

"Tenaprongla kanga mejungi lir. Tena 'coma' nung lir aser ICCU-i anir ogo," ta health department-isa metetdaksü.

Barasat hospital nung inyaker resident medical officer (RMO) kati Nipah virus keta alir nurse ajurua liasü aser pa dak-a Nipah virus temaitsü lir. RMO ji tangar den pilar anepalur aser Kalyani AIIM nung aliba Virus Research and Diagnostic Laboratory

(VRDL) nung test aika agiogo, ta kasa osang ajanga metetdaksü.

Osang angazükba agi, nurse ana nungjagi kabo tawa ang Purba Bardhaman district kübok lar jila Katwa nungi arua liasü. La shirang tenzükb sülen December 31 nü local hospital kati tama anir oa liasü saka la temang tamajungba küma Bardhaman Medical College-i anir ao. Iba sülen la Barasat hospital-i anir ao aser tesüsa Beliaghata ID Hospital-i anir ao.



New Delhi, January 14, 2026: New Delhi nung tensa mejungi lia mosque anasa police aliba noksa nung angur. Tawa Faiz-e-Ilahi Mosque anasa MCD-i kiojen benoktsüba mapang rara adokba sülen tang tashi nung nisung 20 süogo aser iba tatalokba dak sendakba nung nisung 20 shi puogo.

बैंक ऑफ़ बड़ौदा
Bank of Baroda

PUBLIC DANG SANGDONGER

Public dang ya sangdonger, Bank of Baroda, Circular Road, Dimapur, Nagaland-i tsünglanglen **Mrs. Bokali Zhimo** tenüung nung aliba kiojen ya **M/s. Affluent Enterprises & Services** Proprietor nem agütsüba credit/ loan facility atema security agitsü tebilemba lir.

Tsünglanglen shia aliba kiojen dak sendakba nung kar danga temeden/title/ interest/claims lira anogo 10 tsüngda kuli bener Bank dangi arutsü metetdaksür. Anogo 10 tsüngda telangzüba kecha melira iba kiojen ya tashishitsü kecha mali ama agizüktsü aser Bank-i mortgage asütsü atema inyaksangshitsü.

Kiojen osang tejangia:

Darogajan A K, Mauza No. 3, Dimapur, Nagaland nung aliba ali tasazük 02B-00K-00L, Patta No. 221, Dag No. 361

North tsütsülen: Bokali Zhimo, **East tsütsülen:** Approach Road, **South tsütsülen:** Approach Road, **West tsütsülen :** P Lotha kimong.

Sd/- (Trilochan Sahoo)
Chief Manager
Mob- 9366501739
Date: 14-01-2026

Sd/- (Haihangrang E H Newme)
Empanelled Advocate
Mob- 9402237781

Azüi angoba atema state sorkartemi temenok agütsütsü: SC

New Delhi, January 14 (Agencies): Kibur maliba azütem dak sendakba ken o angadangba mapang nung Supreme Court-i, tanurtem mesüra kanga taintem dak azüi angoba ajanga asüba atema state sorkartemi temenok agütsütsüsa akümtsü, ta ashi.

Justices Vikram Nath, Sandeep Mehta aser N.V. Anjaria nungeri akümba bench-i, "State temi kecha meinyaker, anungji tanurtem aser kanga taintem dak azüi angoba shia, asüba mesüra yirutsüba atema state sorkartemi temenok agütsütsü atema onoki latettsütsüa akok. Ano, 'onoki azü nem chiyungtsü agütsür' ta jembirtem anema-a inyaksü. Azüji nenok kidangi anir oang, kechiba azü nemzüa lenmang janadaksütsü, tangar dak ngodaksütsü mesüra nisungtem tsübudaksütsü?" ta ashi.

Justice Mehta-i, "Azü kati arrshi küm 9 tanur ka yirutsüra ibaji shiba khuret asütsü? Azü

nem chiyungtsü agütsüba organisation asütsü asü? Iba tebilemstü onük ya onoki mangur ama toktsütsü asü?" ta asüngdang.

Special bench-isa, court matsüngdang benokba temepishiba karbo atangji den meputep, ta shia kibur maliba azütemi tanur aser kanga taintem amakba video aika metetdaksü.

Azü meimertemi tamalen court tetuyuba yanglushitsü aser tang aliba tetuyubatem shidak benoktsü atema temepishiba ken otem agüja lir.

Bench-i, "Yimti lenmangtem nung nemzüba azü ajak agientsü atema onoki tetuyuba magütsü," ta metetdaksü.

Bench-isa azüi angoba agi dang masü saka kibur mali nemzüba azü ajanga gari lenmang nung lendong balala ataloka nisung aika asür, ajisüaka sorkar ketdangsertemi itemji nokdangtsü atema kecha meinyaker, ta ashi.

Chhattisgarh kübok Sukma nung Maoists 29-i surrender asü

New Delhi, January 14 (Agencies): Bodhbarnü Chhattisgarh state kübok Sukma district nung Maoists 29-i security sepaitem matsüngdang surrender süogo.

Bastar region tesem balala nung sepaitemi Maoists telungpurtem sashia mita aoba mapang ka nung Maoists frontal wings nungi züngsem 29-i surrender asü.

"Poona Margem" mapatong kübok parnoki police aser CRPF sepaitem matsüngdang surrender asü, ta Sukma Superintendent of Police Kiran Chavan-i metetdaksü.

Bodhbarnü surrender asürtem rongnung Dandakaranya Adivasi Kisan Majdoor Sangthan (DAKMS) nung tongti, Podiam Budhra densema liasü. Pa apuba atema senpet lakh 2 agütsütsü sangdonger liasü. Tanüngba züngsemtemjia Maoists indang Janatana Sarkar wings nung züngsemtem liasü.

Chavan-i, tawa Gogunda nung security camp ka amenokba ajanga Maoists aika surrender asüba nung tongtiband shilem ka agiogo, ta metetdaksü.

Iba camp amenokba ajanga telungpurtem mita aoba jenjang tajungba aküm aser region nung Maoists inyaksangshi kanga nokdanga liasü, ta pai ashi.

Gogunda area ya senzüsempongtsü kanga asakba tesem ka lir. Tamalen iba tesem ya Maoists' Darbha division atema kanga tongtibang tesem ka liasü, ajisüaka iba area nung security camp amenokba sülen Maoists tashi meiti aküm, ta Chavan-i ashi.

Paisa tanüngba Maoists züngsemtem danga rara anener temai adoka taküm akhümketa alitsü ajungshi.

Tawa Sukma anasa aliba district tem nunga Maoists telungpur aika temai adoka surrender süogo. January 8 nü Dantewada district nung Maoists 63 surrender asü aser January 7 nü Sukma district nunga Maoists 26-i surrender asü.

Yaküm küm kija nung Chhattisgarh state nung Maoists 1,500 dak temai surrender süogo. Centre sorkari taküm March 31 anogo tashi nungbo linük nung Maoists meshimeshia samatsütsü nükjidong lir.



TIR YIMYIM YIMOBILEM (EDITRIAL)

DIMAPUR THURSDAY, JANUARY (AENJETI) 15, 2026

Iran Nunger Taginüba

- Tangsen Lemtur

Mapang shia alima tesem balala nung nüburtemi longkak aita yimsüsürtem atsüngdoker mesüra kin kari tiyongtsüi ia tashiyim amshia atsüngdoker. Talisa 2010 küm Arab Spring movement mapang nungi tenzüka lenirtem aser yimsüsürtem aika atsüngdokogo. 2003 küm Iraq nung Saddam Hussein yimsüsüba menden nungi atsüngdok, Tunisia nung Tir Zine El Abidine Ben Ali küm 23 sülen 2011 küm atsüngdok, Egypt Tir Hosni Mubarak küm 30 sülen 2011 küm atsüngdok, Libya nung yimsüsür Muammar Gaddafi atsüngdok, Yemen Tir Ali Abdullah Saleh 2012 küm atsüngdok; yamaji Sudan, Algeria aser Syria linüktem nunga yimsüsürtem atsüngdokogo. Tang tesüsa Iran nung nüburtemi longkak aita tongti lenir Ali Khamenei atsüngdoktsüsa tensa ka nung lir. Iba ya ajanga linük balala nung nüburtemi nisung ka kijai tashi tulu amshia ambangyima yimsüsüba agi laktetba aser tejakleni aoba linüktem nung ama temelenshi aginüba sayur. Aji oda, tang Iran nung timtem adokba yabo Israel nunger den mesüra US den adokba timtem ka masü saka Iran nungertemi pei lima nung yimten yimli nung temelenshi aginüa raraba tongbang ka lir. Tang Iran nung mepetmesü tulu adoka lia US Tir Donald Trump-ia Iran nung yimsüsürtem dang longkak aitba nüburtem anema tashiyim mamshitsü metetdakja amokmerenogo. Alima koba nung kechi atalokdir atalokaka United States-i tama ser tiyongtsüi aitsü meranger. Ibayongji Iran nung lenirtemibo tang Iran nung nüburtemi yimsüsürtem anema apusoba ya US aser Israel nati ajungshiba agi lir, ta tai tongloktsür. Atangji alima tesem aika nung tejenba putu nung alir yimsüsürtem atsüngdoker putu tasenba nung asor lanurtemi yimten tashi amshiner aser peii melungba sorkar aginer. Tanü putu nung linük aika nung lanurtemi aramoka yimsüsüba mapang ka nung Iran nungbo arrshi küm 86 tambur Ali Khamenei-i yimsüsüba ajanga par lima mainer ta aikati bilemer. Ajioda tejenba putu nungi yimsü süa arurtemi maparen aika nung tanü putu nung alirtemi taginüba aser tejangraba mataloktsür. Joko tesüiba küm 35 dak tali Khamenei-i küm aika yimsüsüba mendenji pa senmang ama kümer yimsüsüa arudang linük tejakleni moui nüburtem aika okronga aruba sülen tang nüburtem tejashi jateta adoker. Yamaji yimsüsürtemi pei menden medoktsünüyonga toktsütsüsa mapang kati meneper asütsüa akok ta bilemer. Ashiko yimsüsüba menden nungi pa atsüngdokra Iran nung dang masü saka Middle East/Persia tesem ajaklen yimjung alitsü südi ta aikati bilemer. Iran nung tesüiba anogo 17 shi longkak aita arudang nisung 2,500 dak tali süogo, ajisüaka yimsüsürtem melentsü atemabo taküm-a tenlatsü Iran nungertemi melungtetogo. Joko Iran nung nüburtemi democracy sorkar aginer, aser ibaji ataloktsü atema ano nisung jentii taküm tenla agütsütsüsa akümtsüa akok. 'Gamaan' ta ser telok kati internet ajanga agiba survey ka ajanga Iran nunger shilem 89 democracy sorkar aginüba lemsatepogo. Shidi sürbo Iran nungertemi kanga menor ang apusor. Tanü putu yabo nüburtemi mulungba sorkar shima yimsüsüba putu ka lir. Iba jagi tangbo linük kar dak alaka nisung ka kijai pei sünütsü süa yimsü mesüteter mesüra yimsüsüba mendenji senmang ama mamshiteter. Ajioda Ali Khamenei atema-a pa mapangtong ka arur südi.

OLEMSABANG

Aomongchen Otsü

- Temjenyuba Longkumer

(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Obula: Ayatai! Iba ama talila yanglutetba, puratetba, ajak abensa lir ama bilema, kecha menungdak ama nenoksa tulutiba aser tongtipangtiba ta bilemba talila teyangluba telok ji ya na! Ayaahh obula aser otsüla nunger asoshi tangashia mangashidang aliba, yamaji nenok telok lir ta asüandang kangasa pela bilemer ako. Saka kü temeimba talila teyangluba telok, Obulai ya dang shinur "iba jagi naji shibar mejangjatsür, aser ne indang tera ajakbo mashir, item ajak dak nungi tongtipangba aser sentiba ka ano lirko." Putusa putu sayuba, benschia aser jembiba angazüka aruba koba libaliro, wainshing, chayajako aser pei kechi nungi jakzüka aru, pei kin kidong, sobusolemtsü ayak tejangja, tim kiba lembuyim, aser kija kibong, lokdi, kishikina, kiyonger den tim lipayim koba asen Aor sobaliba dak sendaktepa lir aji tongtipangtiba ako. Nisung ka sor lia aotsüba aser aoba sobaliba tajungji nenoki memetetra aser melitetra nenoki komaka talila yangluluka aoyonga naji nüji Aomongchen chanu ka masütsü. Aser itemji nai aser nenoki talila yanglutetba nungi mesayutsü, melangzütsü, mashitsü saka lokdi puti metetertem, shisakar, temetertem bushia oa asüngdangtsüla aser angazütsüla aji ta asünungdang ne ayak, ne sobutsü abensatsü. Hao! Adangji nenok iba ama senden sentong kati arua atenbaji kangasa tongtipang ka lir. Aor chanu ka ama lokdi nung ochi shia shilem agiba, maparen balala nung tasü ita nokdakba, meranga inyaka, merükteta aser asüngteta libalirobaji ajak madak tematiba aser aji nenok teka nung ama aliba talila teyangluba/AI nung jagi mangutsü. Akhidang asen tsürabur mapang pei kin nisungi longcha petinu penzü ama asen nisung penzüa nükshia arubaji tanga aika liaka, asen sobaliba tajung atema nükshiasa aru.

Talila Teyangluba telok: Otsü obu nenati tetenzük dang ashi ama ali rongsen amer bushiaka mesüra molutettsü merangaka kecha agia matongba shisatsü tanü onoki ngutetoko, iba ya amer alima matsüngdang ku ayakji sayutsü. Kangasa pelaro.

Wazüktet telok: Otsü obu Onok telok tenung Wazüktet shisaluyimer telok nungi Onok ishikati lir, aser ni anüolen tip nungi lir. Iba ama tongtipang aser senti sentong tulu ya onok dak malangba ka otsüla nenati achaayangdaksüba atema kangasa pelar.

Kodang nenati youkba shiti to onok ket atong onok atema tepelatiba anogoji iba anogo to liasü. Aser ibai kodangang mapangi tonga arutsü tasür yongyaseta sobaliba metetba lanu asensortem indangji ano tejangjaba nung longro amai roteta tali temerangba takangba nung metetnüba agi aser tarutsu asen Aor kin asoshi angazuka aser wazüka yunüba agi pelaseta aruba lir.

Otsula: Iba telok yabo tesüngmangtsüka kodanga nibo yamaibo meimla, molutzü adena or alirbo memesük, ishika dang süaka pei tera mamadoki amita alirtem. Tebu nibo tangang temelung ali alur parnoki ashiba ola osü ajakji ajiangjo tsürapuri atep nungi sayutetta aniba telok ya sayur, parnoksa nisung ishitiba süaka teimla tila kabo oda lir ta sayur. Haoja to! Paika rongnungi item lanur ishika ya danga angudang item ya asüng Aomongchen yimer aser Ao kin nükrangdongji ya asütsü. Tesüngmangtsü ka aser jangratemtsü ka tenüng nung jaloka item chichiba wazüktet shisaluyimertem yagi Aor Ayakji wazüka yutettsü. Ayah! Ni pelaseter, ammanng teyong nung milen sangwa tila ka angu medem, ni nemjemseta aser temolung shirangeta aliba mapang ka nung chichiba sayutetba chirtem, parnok kakat shisatsü aika amena bener aser pei tera tejangja wazüka bener nisung kar angudang ku molung anisüngzüker. Atangji nung ajakbo kasa masü, aika rongnung tsüngchi tsürabur aser lanur ishikabosa aliba metetdang Tsungrem tenüng asanger.

Obula: Hao iba telok yabo junger, nia tangang temolung anisüngzüker. Oh lanu asensortem nenok ajaki khi angang nenok tazünga temetetbajibo Tsüngremer ketsanga dena züngdangtetsüsa liaka ya metetang "tangari na alima shisatsü metetbaji masüngdangtsu saka mezung na tenüng shiba, netsü nebu tenüng shiba, na kechi yimer aser kechi kin, kechi kidong ibaji mezüng asüngdangtsü." Oh ku molungjang ajungai bilema aser meima aliba lanu asensortem, ibai otsüla kena indang sentisep tanü asoshi yamai agütsüner, yimibilema tenok tenoka angangangma. Na alima talangtiba, tesademtiba nungjia liyonga oakasa nai ne sobaliba tera memetetra naji terata aser mejangjaba telokdi rongnung nisung ka dang asütsü. Ne temeli ajak anep anepa yanglua ainer oji jembiaa nai ne sobaliba amadokra naji ainer ka dang ta metetang. Nai ne tetsü oshi sendoka doktsür alima den sakoko temesünger oshi aser lenten lima alir oshiji jembia aotsü akok, aji agi na tanü putu nisung ta sayur saka naji tetsüngtaba, tangari mezüngokba nisung ka dang asütsü. Ne dak chichiba ayak ka mali asütsü ta temolungjang nung yuangma. Maneni iba senti sentong asalentong atongla, azü ajak agi nenok lanur asoshi bilema otsüla bendenloksema shia iba sentong atemtsü. Tarutsü nunga arishia lira maneni iba angazükba aser sensaksem agiyonga aotsü.

Otsüla: Haoni! Obulai ashiba otemji nenok molungjang nung ringzunga yur benschia oangma. Ano maneni otsüla olen kar inoksemma shir asenok tanü asoshi sentong ya tatem kumner "Oh! Tashi temetet agi toktepa aliba putu tasenba lanu asensortem, nai anüng petinu ajak takzüteta, alima meimchir aser tashi ajak anokshia shisatsü balala yangluloka nai nasa tulutiba aser tongtipangba ta bilema liaka; nai na ajak abensar ama bilemaka; nai ajak tongtet ama bilemaka; saka nai na arulen, naji shibar ner chirtem dang meshitetra, ner oshi jagi otsü obula nunger otsüji meshitera; Alima nung na nanüng dendaktsüba olatem rongnung ka dang asütsü. Na rataseta, kecha memeteti alinung, nai maneni terataba aser kecha memetetba chirnur putu ka anitettsü. Na aruba, jakzüka, jayajako, oshiooben, sobusolemtsü, temaitsü, otsü kechisarenaji tejen putu indang, item ya süiadokoko ta nai ashitsu akok, asen sobalibaji akhi ta ashitsu akok saka itemji paidoktsü makokba ne tera aser ayak. Ibaji na shibar, kolen nungia jangjadaktsüba ne leniba ajok." Anungji tanü alima putu tasenba nung nai senzüka doktsüra tarutsü ayatai. Ya metetang, "Ibai nai samadaktsüra, na tesama, ibaji nai amadokra nai ne sasa amadoker ta teti bilemtetdangma."

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tesüiba küm ana tsüngda Khristan 2,000 jungnúa tepset: GCR

January 14, 2026: Taoba hopta US nung amenoka aliba Khristan melungtet telok kati, tesüiba küm ana tsüngda yimsü dak sendakba nung Khristan 2,000 jungnúa tepsetogo aser Khristan 3,000 jungnúa puer ao mesüra azük, ta metetdaksü.

2026 Global Christian Relief (GCR) Red List ya January 8 nü sangdonga liasü. November 1, 2023 nungi tenzuka October 31, 2025 tashi nung yimsü dak sendakba nung alima tesem balala nung Khristan 1,972 tepsetba jangjaogo.

Yaküm Violent Incidents Database-i item osang tejangja agüja liasü. Alima tesem balala nung nung yimsü temeden dak sendakba osangtem International Institute for Religious Freedom (IIRF)-i bendener aser iba Database ya parnoki renema liasü.

Alima nung Khristan teimtiba tepsetba linük pongu nungi linük asembo Africa nung aliba linüktem lir. Yimsü dak sendakba nung Khristantem tepsetba linük ajak nungji Islamic State lir, sorkari Khristantem kümzüksü atema meinyaker aser item linüktem nung aibelenertem nem temerenshi magütsür, ta kasa osang ajanga metetdaksü.

Tesüiba küm ana tsüngda yimsü dak sendakba nung Khristantem teimba tepsetba linükji Nigeria lir (Khristan 590 tepset), ajisüaka iba dang nungjagi teimba tepseter

asütsüa akok, kechiyong item ama osang aika magütsür, ta kasa osang ajanga metetdaksü.

Global Christian Relief nung inyakertemi Nigeria semdangba ajanga iba linük nung asalentong yanglur pastor tem aser Arogotem anema inyakba jangjaogo.

GCF-i, "Nigeria nung Khristan lenirtem, tekülem kitem aser Khristantem meyong kiojen kanga amakba ya tatalokba kar masü saka asalentong yanglur reshikangshiba lir," ta metetdaksü.

Africa nungsa Democratic Republic of Congo (DRC) nunag Khristan 447 aser Ethiopia nunga Khristan 177 tepset.

Khristantem teimba tepsetba linüktem rongnung jenjang pezübuba nung Russia aser jenjang pongububa nung Mozambique na lir. Islamic State-affiliated cells aliba Russia nung Khristan 167 tepset aser Islamic State-Mozambique (ISM) telungpurtem aliba Mozambique nung Khristan 94 tepset.

Rwanda linük nung Khristantem tekülem agiba nokdangba densema Khristantem anema inyakba tatalokba 7,700 liasü.

Myanmar aser Nicaragua na nunga Khristantem anema inyakba tatalokba aika liasü. Tang rara aliba Ukraine nunga Tenla ki aika raksatsüogo.

Iba dak alia China nung Chinese Communist Party-i

underground Arogotem mita aoba mapang Khristan lenirtem aika puogo. Tesüiba küm ana tsüngda China nung Khristan 709 puogo. Russia, Iran, Vietnam aser Nicaragua linüktem nunga Khristan aika puogo.

Ano Khristan teimba puer aoba linükji Mexico lir, iba linük nung Khristan 376 puer aoba jangjaogo. Mexico nung temesepba mozü shibelener telok balalai mapang shia pastor tem, Arogo nung lenirtem aser lanurtem anema inyaker, kechiyong Khristantemi temesepba mozü shibelenba anema nokdaker.

GCF-isa, yaküm November ita nung U.S. State Department-i Nigeria ya "Country of Particular Concern" linük ta sangdongba atema pelaba metetdaksü.

Global Christian Relief Tir aser CEO, Brian Orme-i, "Tanü putu nung reshikangshiba ya akhidang ama masü saka ola madoki tanem-tanemi inyakba lir, aser item rongnung tekülem nokdangba, ozüng benokba ajanga mesüra sademsadema Yisu sülen manidaktettsüsa Khristantem anema inyaker," ta metetdaksü.

Orme-isa, "Global Christian Relief Red List ya alima tesem balala nung Khristantem anema inyakba osang lemsateptsü aser alima tesem balala nung yimsü temeden atema inyakertem yaritsü atema lir," ta metetdaksü.

ANO GO ABEN TSÜNGREM DEN

Khristan libaliro tetenzükdak Mathi 4: 18-25.

Meimchir temetetba nung Nazaret nunger Yisui yaribaji meimchiri rasaa ashitsüba atema yari. Asenoki Yisu indang bilembaji Talangzüker aser Kümtetdakba ta angatetba nung dang atemer. Pa aji liasü, saka ano iba dang tali.

Tanga balaka rongnung, Yisuiji mapang ajak nung liba-liro tesayur tulu ka liasü. Yisui tebilemba ka mesüra tangatetba ka nung dang Pa asoshi aser tanger asoshia tekong meranga mesot, Pai ajak asoshi jakla (morality) nung sot. Yisui ajaba odang lir: "Ni anidakang". Iba tajaba nung tashi angatsü asoshi shidak bilemtsü aser shidak alitsü temeshi tebilemtetba nüngdaker. Iba nung Khristan kati Khristan jakla tashi angur.

Telok nung jenjang akatsü asoshi Yisu sayuba liba-liro yimya ozüngji kija takümi amshitsüla. Alima nung rongsen meshidaki lemsatepba nung ni kechi inyaktsü? Ajemrepa alirtem tsütsü Kü tebilemba kechi? Yisui "Kü sülen anidakang" ta ashiba tetezü kechi?

Item nung shisadangang: mapang agia Mathi 5:1-22 zügang. Iba liba-liro ozüng ner telok nung, ne mapa nung, ner arogo nung aser ner kidang koda amshitsü bilemdangang. Nai iba tesayuba nung alitsü meranger asü?

Sarasadem: O Kibuba, ne lemanng Kü dang sayuang, aser ni lenten lemanng nung aniang. T.Ken 27:11

Tenangzükba: Koba lemanng nung na aotsüla iba lemanngji atema ni ne dang ashitsü aser sayutsü: Ni Kü tenük ne dak yur sayutsüngitsü. T.Ken 32:8.

Khristan kaketzülur, Robert Wolgemuth alima nungi pilaogo



Robert Wolgemuth aser pa kinüngtsü, Nancy DeMoss Wolgemuth

January 14, 2026: Khristan kaketzülur, Robert Wolgemuth iba lima toktsür Khrista den tatem makai sentsüwangshi nung alitsü atema ogo; pa arrshi küm 77 liasü.

Robert Wolgemuth kinüngtsü, Nancy DeMoss Wolgemuth ya Revive Our Hearts ministry tentetla lir.

Revive Our Hearts ministry-i sangdong ka ajanga,

hopta asem jungnúa pa 'infection' balala agi timtema aruba, pneumonia aser leukaemia diagnosis sülen pa temang tashi meiti kuma pa tanela pilaogo; idangyongjisa pa Kibuba dangi ogo, ta metetdaksü.

Kinüngbu nem akhüm agüja Nancy-i, "Pilatsü ya kanga tasak. Item anogotem nung nüktzü jenti yimogo aser maneni ano item anogo aika ajangshitsü. Robert-i ni kanga meima liasü. Kibuba meimtsü aser külemi Pa tenzüksü aser tangartem tenzüksü atema Kibubai küna nem küm 10 agütsü. Robert ya ni asoshi kanga senti liasü. Pa pilaba ya ni mamangteter," ta metetdaksü.

"Ajisüaka künü anogobo tasü nungi shia arutsü aser Robert temangji Khrista mesüka akümstsü (Filemon 3:21) ta ni metet. Joko shirangba malitsü, tejashi malitsü aser timtem kecha malitsü," ta lai metetdaksü.

Literary agency Wolgemuth

& Associates (tangbo Wolgemuth & Wilson) Laurie-isa, "Robert-i tasüba tentetsang Wolgemuth-i küm 40 jungnúa Khristan kaketter zülua aruogo.

Pai kaket 20 dak tali zülüogo aser item kaket million 2 dak tali yokogo. Pai züluba kaketter rongnung Lies Men Believe, Gun Lap aser Finish Line densema lir aser Men's Daily Bible atema tekülem onüktema zülua liasü.

Wolgemuth-i mapa nungi anisüngzükba sülen-a pai maneni Revive Our Hearts nung staff tem tenzuka aru.

Pastor aser sayutsüngir, Greg Laurie-i, "Woglemuth-i Yisu aser pa kinüngtsü Nancy meimbaji asenokia menazüksüsa liasü. Robert ya Khristan kaket publisher nüngtugu ka liasü. Künaprong tembar James Dobson-i tama küna metetpelaja liasü. Robert teyari ajanga New Believer's Bible adok. Iba kaket ajanga alima tesem balala nung nisung million aika kongshiogo," ta

metetdaksü.

Laurie-isa, "Robert-i tasüba ya amoi aoba dang lir, kechiyong na kodak nung saaktsü ta shia liasü. Atangji tanep pa Kibuba matsüngdang saakogo. Nancy aser Robert na chirmurtem aser par kibong atema sarasademjang, kechiyong asenoki teimla malirtemi mangyimba ama mang mayimer (1 Tesalonika 4:13)," ta metetdaksü.

Southern Baptist Theological Seminary nung Tir, Albert Mohler-i, "Pai toktsüba senmangji kaketter dang nungi taoba. Pa ya temeim aketba nisung ka liasü. Pa ya kü medemer ka aser adianu ka liasü. Ministry tajung aika adokdaksüba nung pai tongtibang shilem agia lir," ta metetdaksü.

Wolgemuth-i pa kinüngtsü Nancy den jala ana, semchir pongu aser tanabuba semchir asem toktsür pilaogo. Pa mezüng kinüngtsü Bobbie 2014 küm asü.

AO OSHI ANGAZÜKDAK:**TANÜ ANGAZÜKTSÜBA OJANG****Tsüta**

(n) telemzükba, tata shilem, noklem (share)

* Ozü züngari kü tsüta shi tuluka agütsü.

Tsütatep

(v)kati ka nem agütsütep (give each other)

* Onok medemertem rongnung Christmas sempet tsütatep.

OLONG PAITEP # 7384

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti

- (5)

4. Tsük rudenba

- (5)

6. Temzüng tesashi

- (5)

8. S _ _ _ i

- (3)

9. Nisung telemasa

- (3)

10. Anogoshi

- (4)

12. Ajanga aor

- (4)

13. Tsük rizüngdak

- (3)

14. Tebang nungi adokba

- (3)

16. Süngdong tatembangtiba

- (5)

17. Meputep

- (5)

LANGTSÜNGLEN

1. Tenük telong

- (9)

2. Committee dang ajar

- (5)

3. Yagi ki okdoker

- (7)

5. Yim lenmang

- (5)

7. Temoatsü keter meyipa aruba

- (9)

11. Kanga junga menemba

- (7)

12. Majinü

- (5)

13. Tzüma nung senzüba

- (5)

OLONG PAITEP # 7383 TELANGZÜBA**TIPIEN :**1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.**LANGTSÜNGLEN :**1. Tenükjang, 2. Luden,
3. Kioktsü, 5. Lenti,
7. Tajangzük, 11. Teronem,
12. Sempa, 13. Jahaz.**NAI-A YA METETTER**

ICAR-National Bureau of Animal Genetic Resources (NBAGR), Karnal, Haryana ajanga Assam nunger Jitul Buragohain nem 'Breed Conservation Award 2025' agütsüogo. Jitul Buragohain ya

Lakhimpur district kübok Sinai Gohai Gaon nung aluyimer ka lir aser pai küm aika lisopur Luit buffalo breed kanga junga metsüa aruba ajiteta iba sempet agütsüogo.

Arunachal kaketshir 2 R-Day Special Guests ama shim**Itanagar, January 14, 2026**

(Agencies): Arunachal kübok Namsai district nungi Class XII science kaketshir ana New Delhi nung 77 buba Republic Day benjungmung nung shilem agitsü shimtetogo.

Kaketshir ana ya Government Higher Secondary School, Chongkham nungi lir aser tenati Special Guests ama shilem agitsü.

Tena ya Nang Sujata Jenow aser Kusum Kumari Mishra na lir aser tenati plastic waste management indang mapatong ka yangluba atema iba konang angur.

School Innovation Marathon

kübok national level nung tenati yangluba mapatongji shimteta liasü. Iba ya NITI Aayog ajanga Atal Innovation Mission indang tetoktepba ka lir.

Nang aser Kusum nati yangluba mapatong ya online project review process ka ajanga asadanga liasü.

Kaketshir anati plastic waste ajemtsü aser plastic-free future ajungkettsü atema iba mapatong inyak.

Tena indang physics tesayur Moirangtham Surchand Singh lenisüba kübok ita aika agia tenati iba model yangluteta

liasü.

Arunachal Pradesh nungi taküm GHSS Chongkham dang shimtetogo aser iba ajanga Northeast nung student-led innovation adokba sayur.

"Tena dak sempet aser meranga inyakba ajanga ozü reju atema konang bentsür aruba dang masü saka asen lanurtemi sustainable India alizüng atongtsü ta kuli sayuogo" ta GHSS Chongkham principal Toni Pertin-i ashi.

Namsai district administration aser school temi kaketshirtem aser tena tesayur nem tenüsang agütsüogo.

Railways-i Amrit Bharat Sleeper sentong atema renemteper**Guwahati, January 14, 2026**

(Agencies): Additional Divisional Railway Manager (ADRM) Ajay Pradhan-i anir ketdangsürtemi Moranhat Railway Station semdangogo.

Amrit Bharat Sleeper train service tenzütsü aliba jakdang ADRM-i anir ketdangsürtemi iba mapa inyak.

Dibrugarh aser Moran Hat railway station tem nungi Amrit Bharat Sleeper train service tenzütsü. Iba service tenzükb nung shilem ka ama Moranhat Railway Station nung inaugural programme ka agitsü aser

Prime Minister Narendra Modi-a video conference ajanga adentsü ta Railway ketdangsürtemi ashi.

ADRM Ajay Pradhan-i special train ka nung senior railway ketdangsürtem den külemi Moranhat station-i ao aser maparen inyakba reprangdangogo.

Prime Minister Narendra Modi-i January 17 aser 18 anogotem linük nung Vande Bharat aser Amrit Bharat train tem tenzütsütsü sentong lir.

Iba nung shilem ka ama Dibrugarh nungi Amrit Bharat

Sleeper train ka tenzütsü. Iba train ya Dibrugarh-Moranhat-Guwahati-Lucknow (Gomti Nagar) route nung senzütsü.

Maneni, Simaluguri aser Mariani dena tanga station tem nunga inaugural programmes agitsü.

ADRM Ajay Pradhan-i security arrangements, passenger amenities, platform decoration, communication systems aser tanga maparen meyipa reprangogo aser ketdangsürtem nem sentong tiptema agitsü atema tetuyuba agütsü.

**OFFICE OF THE PRINCIPAL
CLARK MEMORIAL HIGHER SECONDARY SCHOOL, IMPUR
SITUATION VACANT**

- PGT-Political Science 1 Post**
Requisite Qualification- Post Graduate degree from a recognized University with B.Ed. and a minimum of 45% in the concerned subject.
- Office Assistant 1 Post**
Graduate in any discipline with Diploma in Computer Application.
- Written and Oral test will be conducted.**
Interested candidates fulfilling the requisite qualification may apply with complete Bio-Data through the school mail provided, on or before 30th January 2026 addressed to Principal CMHSS, Impur. Timefor written and oral test will be intimated personally.
Email: cmhssimpur1895@gmail.com

**Sd/-
(CHUBAINLA)
Principal
CMHSS, Impur**

**GOVERNMENT OF NAGALAND
DIRECTORATE OF PRISONS
NAGALAND : KOHIMA**

NO.PRI/HQ/ESTT-559/22/913**Dated Kohima, the 13th January, 2026.****NOTIFICATION**

In pursuance to the Department's Advertisement NO. PRI/HQ/ESTT-559/22 Dated Kohima, the 22nd May, 2025, the List of Candidates for Viva-Voce and other relevant details are uploaded in the Department's website <https://prisons.nagaland.gov.in> and the Notice Board, Directorate of Prisons, Nagaland, Kohima.

**Sd/-
(RENCHAMO P. KIKON) IPS
Director General of Prisons
Nagaland, Kohima.**

Thailand nung crane ka train nung tsük, nisung 29 asü



Bangkok, Aenjeti/January 14 (Agencies): Bodhbarnü Thailand northeast tsütsü passenger train ka pa lenmang nung jaja alidak kisü-jensüba nung amshiba crane ka tsüka train ya lenmang nungi pila aser iba lendong nung nisung 29 asü. Iba den ano nisung 64 yiru aser rescuer temi iba train teraksa kaka bushia first aid agütsüba mapang lir.

China den Southeast Asia linük timba sendakteptsü mangdang nung high-speed rail project inyakba tesem nung iba lendong ya ajuru.

Crane ya railway nung azüklen ajungketba tesem yangluba nung amshia liasü aser train ya Bangkok nungi Ubon Ratchathani province leni aoba mapang tsük, ta Nakhon Ratchasima province atema public relations office ajanga ashi.

Thai media nung noksa prokshiba nung iba lendong atalokba tesem anasa mokozü temesüng aser tanak adoka liasü aser kisü-jensü nung amshiba osettsüset tem concrete support pillars ana tsüngta sangzúa liasü.

Rescue workers tem makeper aliba railway carriages ana tema nung nokdaka liasü, kar tapok apatsü merangba ThaiPBS ajanga video prokshiba nung sayu. Crane loksar train lenmang nung prokshia liasü aser paramedics temi yirur aliba passenger tem nem first aid agüja liasü.

Train nungya carriages asem liasü aser tesülen aliba ana tamajungtiba raksa ta ashir.

Iba train nung nisung 195 mena liasü, ta Transport Minister Piphat

Ratchakitprakan-i ashi aser bushisüngdangtsü totuyuba agütsüogo ta ashi.

Azüklen ajungketa aliba segment chirepba ya Thai-Chinese high-speed railway project nung shilem ka lir, koba ajanga linük yimtiba Bangkok aser Laos arütsülen Nong Khai province sendakteptsü.

Two-stage rail project ya sen 520 billion baht (\$16.8 billion) dak tema indoka yanglutsü aser iba ya Beijing indang Belt and Road initiative kübok Southeast Asia den China sendakteptsü sentong nung sendaktepa lir.

2024 küm August ita Nakhon Ratchasima nungsa kasa lenmang nung railway tunnel ka chirepa mapa inyaker asem asü. Anogo aika tzunglu kanga sashia aruba ajanga iba lendong ya atalok südi ta amanger.

Iran nung longkak aiter 2,500 dak tema tepsetogo

Dubai, Aenjeti/January 14 (Agencies): US Tir Donald Trump-i tekumdagtsü shiaka Bodhbarnü Iran indang obendanger tekolakbai linük tesem ajunga nung longkak aitba mapang apurtem indang ken o tekeraba nung jembia temerenshi agütsütsü ama shiogo.

Pua alirtem yakta alenseta südaktsütsü akok ta activists temi tekumdagtsü ashiba mapang Iran obendanger tekolakba Gholamhossein Mohseni-Ejei nungi iba o ya ashi. Security force temi longkak aiter 2,571 tepsetogo, ta US nung aliba Human Rights Activists News Agency ajanga ashi. Ibai Iran nung küm aika tsüngta longkak aitba mapang asüba dang kanga agi timba lir aser iba linük nung 1979 Islamic Revolution nung rongrong adokba bilema arur.

June ita iba Islamic Republic anema Israel-i anogo 12 raraba mapang United States-i Iran indang nuclear sites nung bomb pokloktsür ita ishika dang lir yimjung nung longkak aiter tepsetba mechi United States-i mitkar tashi amshia mapa inyaktsü ta Trump-i tekumdagtsü nenshia ashir.

Kasa mapang Bodhbarnüsa longkak aitba mapang tepsetba security force züngsem 100 aremtsü atema Iran-i renemshia liasü aser nüburtem yimtung nung tsüboa senzür. Kiyong balala nung security forces plainclothes agir senzür, aser anti-riot police aser paramilitary Revolutionary Guard indang volunteer Basij force züngsemtem pei aliba barracks-i meyipa yokogo.

Mohseni-Ejei-i jembiba video ya Iranian state television ajanga online nung lemsatepa liasü.

"Asenoki mapa ka inyaknüra, asenoki aji tang inyaktsüla. Asenoki langka inyaknüra, asenoki aji kera inyaktsüla. Ibaji menura, ita ana, asem menurbo ibaji ajanga kasa mokongshitsü. Asenoki langka inyaknüra, asenoki kera inyaktsüla," ta pai ashi.

Pai jembiba ya Trump indang-indanga ayongzükba amai lir, shibai Iran dang longkak aiter metepsettsü Mongulbarnü CBS den sensaksemba mapang shia liasü.

"Asenoki kanga tesashi mapa inyaktsü. Parnoki iba amaji inyakra, asenoki kanga tesashi mapa inyaktsü," ta

Trump-i ashi.

"Iran nung atalokba asenoki mereprangner. Aser parnoki longkak aitba aginüra, aji balaka, saka parnoki nisung meyrirjang aika tepsetra aser nai tang kü dang nisung alenseta südaktsüba indang shira - parnoki koma inyaker aji reprangtsü. Ibaji tajungbo masütsü."

Kasa mapang activists temi Iran nung Starlink ajanga service angati agütsür ta Bodhbarnü ashi. Iran ketdangsüri January 8 nü internet shibangtsüba sülen satellite internet service ya kanga tongtipang kumogo. Mongulbarnü nungi tenzuka Iran-i nüburtem dang linük balala den parnok indang mobile phones amshia jembitsü melar, saka bendanglen nungi Iran nung aliba nüburtem den jembiba nokdanga lir.

Human Rights Activists News Agency ajanga ashiba agi, asür 2,403 longkak aiterem aser 147 ya sorkar den sendaktepa alirtem lir. Tanur 12 tepsetogo aser longkak aitba nung shilem magir civilian toku dena lir. Nisung 18,100 dak tema puogo, ta iba telok yagi ashir.

Venezuela nung tepuoker 400 dak tema chiokogo

Caracas, Aenjeti/January 14 (Agencies): National Assembly tir Jorge Rodriguez-i ashiba agi, Venezuela nung nisung 400 dak tema tepuokdak nungi chiokogo, koba rights teloktemi tawa tepuoker 60 nungi 70 tsüngda chiokogo ta ashiba den meputep.

Yimden yimsüsüba dak sendakba nung tepuokertem chioktsü atema akhangba mapang ka nung tang iba jenjang ya agiogo.

Jorge Rodriguez-i iba osang ya Mongolbarnü parliamentary session ka amenba mapang sangdonga liasü.

"Yimden yimsüsüba dak sendakba nung tepuoker masü saka yimden yimsüsür kar shirnoki temzung özüng alema inyaksangshi aser invasion atema ayongzükba nisung kar chioktsü atema telemtetba agiogo," ta Rodriguez-i parliament dang ashi.

Pai, tepuoker 400 dak tema chiokogo ta ashi, saka parnok chiokba aser chioktsü aliba dak sendakba nung mapang tatakzük indang osang tejangja magütsü.

US State Department ketdangsürtemi ashiba agi, tepuokdak nungi chiokba nisungtem rongnung US nungera densema liasü, ta AFP news agency sangdong ka ajanga metetdaksü.

"Venezuela nung puoka aliba America nungertem chiokba

onoki pelashishia agizüker. Lenmang metongshitsü atema interim ketdangsürtemi kanga dang tongtibang jenjang ka agiogo," ta ketdangsür yagi ashi.

January 3 nü Venezuela tir Nicolas Maduro US nunger sepaitemi apuba sülen Rodriguez aser United States tir Donald Trump napronglai, yimjung temaitsü tepuokertem aika chioktsü ta shir liasü.

Venezuela nung yimden yimsüsüba dak sendakba nung tepuokertem chioktsü atema rights teloktem, international lokti tentettem aser opposition lenirtemi takhangba agüja aruogo.

Venezuela sorkari parnoki yimden yimsüsüba dak sendakba nung shinga pua mali ta shia aruogo aser ashiba agi, 2024 küm tir election anema longkak aiter 2,000 shi apuba teimba ka chiokogo.

Human rights teloktemi, Venezuela nung yimden yimsüsüba dak sendakba nung tepuokdak yua alir 800 nungi 1,200 shi asütsü ta asatetogo aser taoba hopta nungi tang tashi nung tepuoker 60 nungi 70 tsüngda chiokogo ta ashi. Tepuokertem kanga meyilongi chiokba atema parnok temulung masüba lemsatepogo.

Venezuela indang Ministry of Penitentiary Services-i ashiba agi, Hombarnü tepuoker 116 chiokogo.

Thai nunger sepaitemi civilian aliba tesem atsünger lir: Sokhonn



Phnom Penh, Aenjeti/January 14 (Agencies): Thailand military-i Cambodia nung civilian tem aliba tesem maneni atsünger lir. Parnoki tesem karbo barbed wire aser shipping container tem agi nokdang lir aser iba ajanga kidanger ana tsüngda taoba küm rara anentsü atema tenangzüktepba yangluba lendongbang nung toktsür, ta Cambodia foreign minister-i ashi.

Decemeber ita tenangzüktepba ka yanglua arrtsü nung rara tembangdakjaka Cambodia nunger kibong 4000 shi Thai nunger seapitemi tenokdangba agütsür aliba agi pei kidangi meyipa moteti lir, ta Prak Sokhonn-i Reuters dang ashi.

"Thai military-i Cambodia nung tesem kar maneni atsünger lir," ta pai linük yimtiba Phnom Penh nungi interview ka

nung shilem agiba mapang ashi. Paisa, Thai nungertemi tesem pezü atsünger lir ta metetdaksü.

"Tensa süngjema lir, saka lendonga keta lir. Anungji Thailand-i ceasefire atema nangzüktepba ajunga benoka inyaktsü onoki imla atar," ta paisa shisem.

Kasa mapang nung Thai military aser sorkar ketdangsürtemi Cambodia-i parnok aitsüba ya tamendakdak maka ta shiogo.

"Ceasefire sülena sepaitem maninba ya nangzüktepba nung shilem ka lir. Iba ya litsü atsüngba ama magitsüla," ta Thai ministry-i ashi.

July ita raratepba U.S. tir Donald Trump teyongtsüi ia anendaktsüba sülen Kidanger linük ana tsüngda December ita anogo 20 tashi fighter jet, rocket aser artillery amshia raratepa liasü.

December ita rartepba mapang nisung 101 asü aser linük anaprongla nung nisung million tesadang ka dak tema pei talidak ki toktsür jenshia oa liasü.

Tawa Cambodia-i arrtsü kanga junga lateta ayutsü atema Joint Boundary Commission senden ka amentsü Thailand ayongzuka arudar, saka Bangkok-i kecha telangzüba agüja mali.

Imkumnaro Pongen aser Sentitoshi Jamir na B-Level Referee kümogo



Dimapur, Aenjeti/January 14 (TYO): Nagaland Basketball Association (NBA)-i, Mongsenyimti yimtsüng nungi Imkumnaro Pongen aser Chungtia nungi Sentitoshi Jamir nati Kolkata nung 39buba Youth National Basketball Championship asayaba mapang BFI Referees tatidang nung takok tajung anguba atema tenüangsang agütsüogo.

Tena referee tem rongnung züngoksemba sülen Nagaland nungi nationally certified B-Level referees pezü kümogo, koba state nung basketball asaya terenlok aser officiating standard nung alizüng tongtibang ka tongtetba asütsü.

Imkumnaro Pongen-i mapang aben court nung tatishitsü tajung sayuogo aser lai kanga bendanga agüja asaya aruogo. 2024 küm

Mokokchung nung N.I Jamir Memorial Basketball Tournament asayaba mapang la Intermingle Club nungi asaya-a gold medal angu aser Dimapur nung Nagaland Olympics 2024 asayaba mapang la bronze medal anguba Mokokchung team nung densema liasü. Maneni la 2022 küm Shillong nung Northeast Olympic Games asayaba mapang Nagaland team nungi asaya liasü.

La asayar aliba nungi referee akümba ajanga lai iba asaya bendanga agüja tenzükbä aser basketball asayartem rongnung lenisüba shilem tajung agiba sayur.

Kasa mapang nung Sentitoshi Jamir ya tang Netaji Subhas Southern Centre, Bengaluru nung Diploma in Sports Coaching agidar. Pa Ludhiana, Punjab nung 73buba

Senior National Basketball Tournament nung Nagaland tenüng nung asayaogo aser 2024 küm Chumukedima nung North East Games 2024 asayaba mapang bronze medal ka ngua liasü. Paisa, Sports Coaching nung hopta trok agiba Certificate Course ka tembanga agiogo aser iba ajanga pa technical tamendakdak tashi itshidaktsüba dang masü saka iba ajanga panem asaya tajungba angatetdaksür.

Tena nem iba certificate agütsüba ajanga Nagaland nung asaya ketdangsüba jenjang ajungketba dang masü saka iba ajanga referee akümtsü jangrartem aser asayartem ajungmesotsü. NBA-i Imkumnaro aser Sentitoshi na nem tenüangsang agütsür, ta kasa sangdong ajanga metetdaksü.

Delhi ya badminton asayatsü tetemsü masü: Antonsen



Aenjeti/January 14, 2025 (Agencies): Mia Blichfeldt sülen Denmark nunger nüngtugu asayar Anders Antonsen-i India Open aitsüogo aser ashiba agi, Delhi mopung kanga majung asünung badminton asayamung ka ayongzüka asayatsü tetemsü masü. Paisa, mopung memerekba ajanga pai küm asembuba iba asayamung nung masayatsü atema telemtetba agiogo, ta ashi.

Antonsen-i taoba World Championships nung bronze medal ka nguogo aser taküm iba asayamung ya Delhi nung asayatsü lir, anungji pa iba asayamung nung asayatsü

masayatsü mejangja.

Instagram ajanga Antonsen-i, Delhi mopung kanga menenba ajanga pai iba asayamung nung shilem magitsü telemtetba agi ta ashiba den, iba asayamung nung shilem magiba atema badminton achaayangba lokti tenteti pa dang senchi USD 5,000 chiogo ta shisem

"Nisung aikati ni kechiba India Open nung küm asembuba shilem magir ta bilemer. Delhi nung tang mopung kanga temenen lir anungji iba tesem ya badminton asayamung ka ayongzüka asayatsü tetemsü masü ta bilemer," ta Antonsen-i Instagram nung zülutsü.

Mongolbarnü Blichfeldt-ia,

IG Stadium venue tasenbuba nung asayatsü majungba indang ashishiogo aser ashiba agi, hall melenshiba ajanga asayartem atema parnok meketa aliba tesemtem memerekba kecha balaka tajungba maküm. Iba taitsüba ya Badminton Association of India-i magizük.

BAI-i taküm India Open Super 750 ya KD Jadhav Hall nungi Indira Gandhi Indoor Stadium-i belenerogo, kong taküm August ita World Championships ayongzüka asayatsü sentong lir. Küm 17 sülen tang mezügbuba India nung World Championships asayatsü lir.

Denmark tsür world No. 20 asayar shiba tanabuba round-i iogo, lai ashiba agi asayaba tesem melenshiba sülen temelenshi adoktsü ta bilema liasü saka kecha temelenshi mali ajak kasa dang.

Kasa mapang nung BAI Secretary General Sanjay Mishra-i ashiba agi, "ni voice recording angashiogo aser statement-a züngogo; ana ya meputep. Voice recording nung lai tenüangsang jembisaka ni azüngbabo tamajung liasü."

ICC ODI rankings nung Kohli No.1 asayar kümogo

Aenjeti/January 14, 2025 (Agencies): Virat Kohli-i tawa kanga junga asayaba sülen pa ICC ODI batting rankings nung No.1 asayar kümogo. New Zealand den Vadodara nung Mezügbuba ODI asaya nung kanga junga asayaba sülen pa 2021 küm July ita sülen tang mezügbuba temaba jenjangi tuogo.

Asaya nung Kohli-i ball 91 nung run 93 yangluba sülen India team-i wicket pezü agi iba asaya kokogo aser arishi küm 37buba nunga Kohli ya iba format nung temulunglemtsü kanga aketba asayar ka lir. Iba asaya kanga junga asayaba sülen Kohli-i Rohit Sharma ajatetogo, shiba tasembuba jenjangi asepzüka luogo.

Asaya nung run 93 yangluba ya Kohli asoshi kanga tongtibang liasü, kechiyong pa tebur international cricket nung run timtiba yangluba tanabuba asayar kümogo aser Sachin

Tendulkar dang memenepi lir. Kohli-i taoba ODI asaya pongu nung Australia den out mesüi run 74, 135, 102 yanglu aser South Africa den out mesüi run 65 yangluba sülen New Zealand den run 93 ya yanglua liasü.

Kohli ya mezügbuba 2013 küm October ita ODI batter tem rongnung No.1 asayar aküm aser tang agi 11benbuba pa temaba jenjangi tuogo.

India captain Shubman Gill pongububai tuogo aser Shreyas Iyer-a top 10 nung lir. New Zealand nunger asayar Daryl Mitchell tanabuba jenjangi tuogo aser pai Kohli rating point ka agi dang memenepi lir.

Bowler tem rongnung India nunger pacer Mohammed Siraj jenjang pongu tejakdangi tua tang 15buba nung lir aser kasa mapang nung New Zealand nunger fast bowler Kyle Jamieson-a jenjang 27 tejakdangi tua tang 69buba nung lir.

Joao Cancelo Loan nung Barcelona-i meyipaogo



Aenjeti/January 14, 2026 (Agencies): Defender Joao Cancelo Mongolbarnü Saudi Arabian club Al-Hilal nungi Barcelona nung loan nung oa denogo. Pa season tatem tashi iba club nungi asayatsü.

"Nai kodanga mamatokba tesem kar lir.. Joao na Barca-i tanaben pelashishia agizüker," ta Catalan club yagi social media nung post sütsü.

Barcelona aser Al-Hilal nati Portugal nunger full-back ya season tatem tashi loan nung oa asayadaksütsü atema mulungtepogo, ta club anapronglai jangjatsüogo.

Arishi küm 31 tain right-back ya 2023-24 season-a Manchester City nungi loan nung oa Barcelona nungi asaya liasü. Pa taoba season Barca nungi asaya 42 nung asaya.

Cancelo ya Roberto Martinez-i aniba Portugal squad nung teti dang

asayadaksüba asayar ka lir, saka pa Al-Hilal nung aibenbo masayadaksüi liasü. Pa 2024 küm Man City nungi pound million 21 agi alizüka liasü.

La Liga nung temaba jenjang nung aliba team-i Cancelo parnok den adenba osang ya Mongolbarnü metetdaksü.

Centre-back Andreas Christensen December ita temekok nung ligament yiruba sülen La Liga temzüng ozüing ajanga Barca nem pa indang taah shilem ka amshia asayar tasen ka züngoksemtsü asoshi temelaba agütsü, aser iba ajanga Hansi Flick-i aniba team indang defence akangshitsü asoshi Cancelo anir arutetogo.

Copa del Rey round of 16 nung Barca pur Brehostibarnü second division nung temaba jenjang nung aliba Racing Santander den asayatsü lir.

BILEMDANGANG

Meranga inyakba ajanga takar akümertemji onsara tenükshitsü aket."